

四庫全書

史部

欽定四庫全書

史部

欽定熱河志卷六十三至六

詳校官編修臣曹斌

檢討臣德生覆勘

總校官舉人章維樞

校對官編修戴心亨

謄錄監生陶嗣曾

欽定四庫全書

欽定熱河志卷六十三

建置沿革九

明

明

明初屬北平府尋改屬北平行都司為大寧衛新城衛富峪衛會州衛全寧衛營州衛興州衛地今承德府本地灤平縣豐寧縣為興州左右中前後五衛及宜興守禦千戶所地豐寧縣西北境兼得開平衛地平泉州為大寧新城富峪會州四衛及寬河守禦千戶所地赤峯縣為全寧衛地南境為大寧衛地建昌縣朝陽縣為營州左右中前後五

衛地朝陽縣東兼得大寧衛地後俱廢

按明實錄洪武三年七月辛卯以古北口山外
興州雲州隸北平府四年罷山後諸州徙其民
於山南明史未詳乃史家之漏以實錄為據知
明初尚仍元時州縣之制也但不久旋罷其併
省之跡遂不可考耳

明史地理志北平行都指揮使司本大寧都指揮
使司洪武二十年九月置

治大寧衛

二十一年七月更

名永樂元年三月復故名僑治保定府而其地遂
虛西南距北平布政司八百里

大寧衛

元大寧路治大定縣屬遼陽行省

洪武十三年為府屬北

平布政司尋廢二十年八月置衛九月分置左右

中三衛尋又置前後二衛二十八年四月改左右

後三衛為營州左右中三護衛永樂元年二月省

又徙中前二衛於京師直隸後軍都督府

洪武二十四年

四月寧王府建於此永樂元年遷於江西南昌南有土河東南有大棘場東北有惠和縣又有武平

縣東有和衆縣元俱屬
大寧路洪武中俱廢

按大寧衛治即元大寧路大定縣治復兼有元
時惠和縣武平縣及和衆縣境當為今平泉州
屬喀喇沁扎薩克公旗喀喇沁右翼旗及赤峯
縣南境地又迤東北至建昌朝陽縣屬教漢奈
曼旗迤東至朝陽縣屬喀喇沁左翼旗地方興
紀要謂大寧衛東至泰寧夷衛七百里南至永
平府邊四百五十里西南至喜峯口邊四百八

十里西至開平衛四百三十里自衛至京師八百里蓋營州興州諸衛皆統於大寧都司也

新城衛洪武二十年九月置永樂元年廢距行都司六十里

按新城即今之黑城在大寧城之西南為今平泉州屬喀喇沁扎薩克公旗地

富峪衛本富峪守禦千戶所洪武二十二年二月置二十四年五月改為衛永樂元年二月徙置京

師直隸後軍都督府距行都司一百二十里

按富峪衛在新城之西南為今平泉州屬喀喇

沁扎薩克公旗南境地

會州衛洪武二十年九月置永樂元年廢

南有冷嶺西北

有馬孟山廣袤千里土河之源出馬下流合於潢河又南入於遼水

按會州衛在富峪城之西南為今平泉州境在

治南二十里

馬孟山廣袤千里乃史志之誤

詳見山門

全寧衛

元全寧路直隸中書省

洪武中廢二十二年四月置

衛永樂元年廢

有潢河又有黑龍江

西南距行都司二百

原本

缺里

按全寧衛在大寧衛之北即元之全寧路在魯王分地中者在今赤峯縣北巴林旗境志稱衛西南距行都司二百里以外地有潢河潢河經流赤峯縣翁牛特旗境方位相合所云黑龍江當即巴林旗境之黑河耳

營州左屯衛洪武二十六年二月置永樂元年三

月徙治順義縣屬大寧都司

南有塔山

按塔山今在土默特左翼旗之東南是營州左

衛為今朝陽縣屬土默特左翼旗地

營州右屯衛

元建州屬大寧路

洪武中州廢二十六年二

月置此衛永樂元年三月徙治薊州屬大寧都司

西北距行都司四百里

按營州右衛即元建州為今朝陽縣屬土默特

右翼旗西南境地

營州中屯衛

元龍山縣屬大寧路

洪武中縣廢二十六年二

月置此衛永樂元年三月徙治平谷縣西屬大寧

都司

南有榆河

按營州中衛即元龍山縣為今建昌縣屬喀喇

沁左翼旗南境地

營州前屯衛

元興州屬上都路

洪武三年七月屬北平府

五年七月廢二十六年置此衛永樂元年三月徙

治香河縣屬大寧都司

西有新開嶺南有老河源出馬孟山流經此又經行

都司城東北入於潢河西南有興安縣元屬興州順帝後至元五年四月廢

按明營州諸衛於元時為興中州地屬大寧路其興州五衛則為元興州地屬上都路是興中州之與興州一在今朝陽縣一在今灤平縣相距甚遠明地理志於營州前衛下注元興州都路者誤也至老河經流之地自當在大寧衛新城衛境與營州無涉而去興州亦甚遠並誤又志於大寧衛會州衛下俱注有土河而於營州

前衛下別注有老河亦未知土河與老河本為一水耳

營州後屯衛洪武二十五年八月置永樂元年三月徙治三河縣屬大寧都司

按明志於營州五衛俱未詳距行都司之道里營州本以興州故城得名而左右中諸衛無即治營州故城者明太祖實錄洪武二十五年八月庚申置營州後屯衛二十六年二月壬辰置

營州中前左右四屯衛後衛獨最先置者疑其
即治興中州城也

興州左屯衛洪武中置永樂元年二月徙治玉田
縣直隸後軍都督府

興州右屯衛洪武中置永樂元年二月徙治遷安
縣直隸後軍都督府

興州中屯衛洪武中置永樂元年二月徙治良鄉
縣直隸後軍都督府

興州前屯衛洪武中置永樂元年二月徙治豐潤縣直隸後軍都督府

興州後屯衛洪武中置永樂元年二月徙治三河縣直隸後軍都督府

寬河守禦千戶所洪武二十二年二月置永樂元年二月徙治遵化縣仍屬大寧都司又僞置寬河衛於京師直隸後軍都督府

東南有寬河一名豹河下流經遼安縣西

北又東合於滌河

按寬河即今之寬城在會州城之南今平泉州

南境地

宜興守禦千戶所

元宜興縣屬興州致和元年八月升為宜興州

洪武二

年兼置衛屬永平府三年三月屬北平府六月改
衛為守禦千戶所五年七月州廢存所永樂元年
所廢

按宜興所即宜興州在今灤平縣境其興州五
衛道里未詳大約兼有今承德府本境及灤平

縣豐寧縣地其西北為開平衛即元之上都路
洪武二年為府屬北平行省尋廢州置衛屬北
平都司永樂元年二月徙衛治京師直隸後軍
都督府四年二月還舊治宣德五年遷治獨石
堡改屬萬全都司而令兵分班哨備於此後廢
又有開平左右中前後五衛於洪武二十九年
置永樂元年廢並在今多倫諾爾廳界今豐寧
縣之西北境亦開平衛地也

後為諾音

舊作孫顏
今改正

衛及泰寧衛地

今承德府本境灤平縣豐寧縣平泉州建昌縣為
諾音衛地朝陽縣為泰寧衛地

明史地理志景泰四年

明實錄
作元年

泰寧等三衛乞居

大寧廢城不許令去塞外二百里居住天順後遂
入於三衛外國諾音傳諾音福餘泰寧高皇帝所
置三衛地也自大寧前抵喜峯口近宣府曰諾音
自錦義厯廣寧至遼河曰泰寧自黃泥窪逾瀋陽

鐵嶺至開原曰福餘獨諾音地險而強久之皆叛
去成祖從燕起靖難厚賂三衛說之來遂擁寧王
西入闕成祖復選其三千人為奇兵從戰天下既
定徙寧王南昌徙行都司於保定遂盡割大寧地
畀三衛以償前勞

昌平山水記大寧初設未有民人但立一十六衛
自燕府拔之而南遂為空城及轉戰三年始下南
京而大寧已棄之後不能復置因徙衛於山南而

以其地畀烏梁海

按三衛分界惟諾音泰寧二衛屬今承德府全境地王世貞三衛志以為分界定於太祖二十二年鄭曉吾學編以為定於永樂元年明史諾音傳從世貞說然當太祖二十二年正分置大寧諸衛之時諾音三衛安得襍出其地即以為定於永樂元年者亦有未的考明實錄永樂元年十一月命新昌伯唐雲領軍自小興州大興

州東接牛嶺會州塔山龍山諸處屯種北勿出
會州西勿過千戶寨又永樂十九年十一月命
邊將置邏騎營於古北口北神樹之地是其時
開平以東興州以北二三百里猶為內地三衛
之界安得西近宣府宣德三年邊將奏烏梁海
舊作兀良哈今改正 入大寧經會州將及寬河景泰元年
三衛乞居大寧廢城不許今近邊二百里外住
牧曰入曰乞是其時故大寧城猶為邊外隙地

三衛之界安得南抵喜峯今以諸書參考之據
吾學編方輿紀要載洪武二十二年分烏梁海
為三衛於潢河之北曰福餘曰諾音曰泰寧是
三衛之治其地皆在潢河北也終洪武之世未
嘗內徙洪武時大寧衛北尚有全寧衛自全寧
衛北始為諾音三衛其時邊外諸衛總隸北平
行都司大寧特行都司所治之地耳永樂元年
三月始割大寧衛地以畀三衛大約即其近三

衛之地割以與之曰割大寧衛地者其故城尚未割特徙衛之後棄為空城故景泰時三衛乞此城而未許也至大寧城南更非其地其建庭處仍在潢河北英宗實錄稱正統九年討三衛經大小興州過神樹破之於全寧及虎頭山可証也景泰後令去塞外二百里居住始更徙而南考故大寧城距邊四百五十里新城距邊三百九十里其時已令近邊二百里猶不能居大

寧廢城是邊外甌脫地尚遠自中葉以後形勢日蹙邊牆以外視如敵國大寧諸衛始盡為三衛所有吾學編載嘉靖十一年巡撫王大用欲通諾音與厚賂城其霧靈山不果霧靈山在馬蘭關外遵化州界上是其城南抵長城矣明史據世貞之說以後來之疆域為最初之版圖未為核實因詳辯之如此

欽定熱河志卷六十三

欽定四庫全書

欽定熱河志卷六十四

晷度一

授時齊政肇始虞廷而後世測量之法以起極度
晷影每憑地以覘天而總以北極出地高卑度分
爲樞紐又以子午線爲中得東西偏度由是分布
時刻加入節氣諸線得節氣度分言天文家歷代
遞沿而西法尤爲精密承德府全境居赤道北四

十度至四十二度強在地圖東面中線偏東四十
三度至四十七度強京師偏東一度至四度強與
夫分至日景及晝夜刻候皆可以按地分考蓋天
象雖虛而地體則實據表器之器精心以求高卑
贏縮芒忽難清理固然也我

皇上學貫天人識超今古闢分野拘墟之舊說而占候
識緯尤灼知其傳會難徵臣等仰窺

御製禹貢指南詩旨固已曠若發蒙茲論次承德府諸

境極度晷景謹爲分屬排纂而於分野星次則畧
舉史傳遺聞而更詳辨其不可信庶俾管窺槃扣
者流恍然情載之全量益欽惟

聖知天非星史諸家所得仰希萬一也志晷度第八

承德府

即熱河廳 凡測晷極度晷
景俱以府州縣治所爲準

北極出地高四十一度一十分距京師偏東一度
三十分

夏至正午日景三尺一寸九分有奇

定表高一
丈後倣此

晝五十三刻十四分強

夜四十二刻一分弱

冬至正午日景二丈一尺一寸一分有奇

晝四十二刻一分弱

夜五十三刻十四分強

春秋分正午日景八尺七寸四分有奇

晝夜各四十八刻

餘州縣同

灤平縣

即喀喇河屯廳

北極出地高四十度五十八分距京師偏東一度

二十分

夏至正午日景三尺一寸五分有奇

晝五十三刻十四分

夜四十二刻一分

冬至正午日景二丈零九寸二分有奇

晝四十二刻一分

夜五十三刻十四分

春秋分正午日景八尺六寸八寸有奇

豐寧縣

即四旗廳

北極出地高四十一度三十三分距京師偏東初
度二十八分

夏至正午日景三尺二寸六分有奇

晝五十四刻一分

夜四十一刻十四分

冬至正午日景二丈一尺四寸八分有奇

晝四十一刻十四分

夜五十四刻一分

春秋分正午日景八尺八寸六寸有奇

平泉州

即八溝廳

北極出地高四十一度二分距京師偏東二度一

十三分

夏至正午日景三尺一寸六分有奇

晝五十三刻十四分少強

夜四十二刻一分少弱

冬至正午日景二丈零九寸八分有奇

晝四十二刻一分少弱

夜五十三刻十四分少強

春秋分正午日景八尺七寸有奇

赤峯縣

即烏蘭
哈達廳

北極出地高四十二度二十四分距京師偏東二

度五十分

夏至正午日景三尺四寸三分有奇

晝五十四刻三分

夜四十一刻十二分

冬至正午日景二丈二尺三寸四分

晝四十一刻十二分

夜五十四刻三分

春秋分正午日景九尺一寸三分有奇

建昌縣

即塔子溝廳

北極出地高四十一度三十八分距京師偏東三
度五十分

夏至正午日景三尺二寸八分有奇

晝五十四刻一分

夜四十一刻十四分

冬至正午日景二丈一尺五寸六分

晝四十一刻十四分

夜五十四刻一分

春秋分正午日景八尺八寸九分有奇

朝陽縣

即三座塔廡

北極出地高四十一度四十四分距京師偏東四

度二十一分

夏至正午日景三尺三寸有奇

晝五十四刻一分強

夜四十一刻十四分強

冬至正午日景二丈一尺六寸六分有奇

晝四十一刻十四分弱

夜五十四刻一分強

春秋分正午日景八尺九寸二分有奇

元史天文志北京北極出地四十二度強

按元授時術周天三百六十五度二十五百七十五分令法周天三百六十度元史所云四十二度強者當今四十一度半弱元之北京治大寧城在今平泉州治東北一百六十里與今測

亦不甚遠蓋地居天中地體渾圓與天度相應
中國當赤道之北北極常現南極常隱南行二
百里則北極低一度北行二百里則北極高一
度東西亦然經緯有常度測有常法推之二分
二至日晷晝夜分刻立表見景理可明微也若
列星分野之說肇自周官秦漢以來傳述不一
在天或以次言或以星舉在地或据州或据國
中土之地已盡二十八宿方位推之大地七萬

二十里數有所窮是中土星野之分特出於天文家之拘墟沿襲而未足爲據也今承德府全境當古幽燕東北舊說星分尾箕析木之次今據歷代史書所載而綴以論說如左

周禮保章氏以星土辨九州之地所封封域皆有分星鄭康成注析木燕也

爾雅釋天大辰房心尾也大火謂之大辰析木謂之津箕斗之間謂之漢津也

史記天官書尾箕幽州

淮南星部地名尾箕燕

漢書地理志燕地尾箕分野也東有漁陽右北平
遼西遼東西有上谷代郡雁門皆燕分也樂浪元
菟亦宜屬焉自危四度至斗六度謂之析木之次
燕之分也

費直周易分野析木起尾九度

蔡邕月令章句自尾四度至斗六度謂之析木之

次燕之分野

皇甫謐帝王世紀自尾十度至斗七度百三十五分而終曰析木之次今燕分野

晉書天文志自尾十度至南木十一度爲析木燕之分野屬幽州漁陽入尾三度右北平入尾七度遼西入尾十度

魏書律歷志心四至斗一析木

唐書天文志尾箕析木津也初尾七度餘二千七

百五十杪中箕五度終南斗八度自渤海九河之
北得漠河間涿郡廣陽及上谷漁陽右北平遼西
遼東樂浪元菟古北燕孤竹無終九夷之國

宋史律歷志赤道過宮尾宿四度十五分杪五十
四入燕分析木之次黃道過宮尾三度八十六分
杪六十四入燕分析木之次

按宋志又載觀天歷黃道過宮尾宿八度入燕
分與前說異

金史歷志太陽黃道十二次入宮宿度尾三度九十七分九十二秒外入燕分析木之次

元史歷志黃道十二次宿度尾三度一分一十五秒入析木之次

按承德府全境在古漁陽右北平遼西郡邊外其入某宿度分史傳無明文漢書地理志尾箕分野東抵遼東唐書天文志亦及於遼東北燕則承德府屬星分以尾箕屬燕之舊說附近推

之亦畧可考見然古人分星或以配食或以主
祀初未嘗以恒星之次第配九州東西南北之
方位亦未嘗以地之大者星土必廣地之小者
星土必狹其附近邊徼之地即緣邊徼所分之
星而係屬焉如星紀爲吳越分春秋時未有交
趾九真南海日南之地也漢置爲郡亦不過附
於星紀之次如鶉首爲秦分春秋時未有武威
張掖酒泉敦煌之地也漢置爲郡亦不過附於

鶉首之次如析木爲燕分春秋時未有元菟樂
浪遼東西之地也漢置爲郡亦不過附於析木
之次蓋緣三代以下拓地不廣故附諸中土而
有餘若以今之道里計之西域新疆遠拓二萬
餘里已非秦分并鬼二宿所能該况推之以盡
地面一周則中土以外大地尚多又將分以何
星屬以何次乎恭讀

御製題毛晃禹貢指南詩注史記天官二十八舍主十

二州引星經如云角亢鄭之分野之類乃以二十八宿主十二州分配無餘此外更當何屬夫天無不覆星麗乎天亦當無不照今十二州皆中國之地豈中國之外不在此昭昭之內乎且其間有地少而星多亦有地多而星少以天度地輿準之亦不均如井鬼為雍州陝西甘肅皆是其道里之廣已非兩舍所能該而今拓地遠至伊犁葉爾羌喀什噶爾較禹貢方隅幾倍蓰其地皆在甘肅以外將以雍

州兩星槩之乎抑別有所分屬乎此又理之難通者蓋分野之說本不足信而灾祥則更隣于讖緯皆非正道仰

聖論之昭垂誠足以破千古拘墟之見而懸為正的矣且即以舊說論之爾雅以尾屬大辰星與次已相違漢代不知歲差以節氣交宮分十二次之界其交宮又非當時實測後漢賈逵諸人始以史官所注冬夏至日躔所在正之於是十二次

紛紛改定晉虞喜始知歲差宋何承天祖冲之
隋劉焯等言之益詳唐初傅仁之始用歲差朝
論不以爲然李淳風復去歲差不用及一行乃
博考廣證分天自爲天歲自爲歲更以七宿之
中分四象中位而著其分野然觀其區別各次
與堯典春秋傳復時有出入明神宗時西法入
中國以中氣過宮如日躔冬至即而恒星既有
篇星紀宮之類歲進之差於是宮無定宿宿可以遞居各宮古

法因之遞變再以恒星東移歲差五十秒積算
之六千餘年之後南易而東西易而南萬二千
餘年之後南易而北西易而東方位更而分野
亦易是則分野以屬星分星以屬次即中土十
二州之地前後已多參錯況大地之全乎茲故
採綴舊說折衷

聖裁見向來十二州分星之說不過天文家之沿襲傳
會加以占驗機祥尤多恍惚非獨事難徵信亦

理不能通耳

又按古分野之法限於中土則大地難周統全局以規大勢當以周天三百六十度配大地七萬二千里每二百里分應一度盡地面一周而二十八宿之分野始盡說似較爲無弊也第欲以周天分屬大地而恒星有東移之差則以某宿屬某處將以何者爲準而後左右推暨乎曰恒星雖歲差五十秒然二十八宿始初之體原

有定位角亢氐房心尾箕爲蒼龍居東斗牛女
虛爲元武爲元武居北奎婁胃昂畢參臂爲白
虎居西井鬼柳星張翼軫爲朱雀居南是也宿
有東西南北地亦有東西南北以二十八宿東
西南北之本位分配大地東西南北之定位按
諸古志十二州分星之說惟燕爲尾箕之野方
位適相符合蓋以中土地偏東北隅京師又居
中土之東北於八卦屬艮於十干屬癸甲之交

於十二支屬寅於十二次屬析木於星屬尾箕
尾箕二宿之本位亦正在東北隅也以尾箕燕
分爲準而後左右推之盡地面之一周皆與各
宿本位相合是爲亘古不易之星分而十二次
因之至恒星東移歲差五十秒亦隨大地爲轉
易某年屬某宿某度若干分秒以各宿本位所
屬不變者爲體以按年遞值者爲用如是以言
分野則數不窮而理猶可據爲附著其說以備

考

欽定熱河志卷六十四

欽定四庫全書

欽定熱河志卷六十五

山一

承德府全境北界興安大嶺為陰山之正脈左右
層巒疊嶂皆其分支形勢之雄甲於紫塞若龍山
為慕容氏國都七金馬孟諸山為遼金名勝徵名
定位往往而合自

僊莊肇啓巖巒獻秀鍾峯東峙則酈道元水經注之

石挺也廣仁西控則王曾行程錄之墨斗嶺也加以

六飛來往

睿賞留題翠壁丹崖

輝新雲日斯則林壑光華山靈望

幸抑造化神秀顯見有時也爰就各境所屬分按道里
證以史傳所紀取其翔實可徵信者著之凡蒙古
諸名音譯舊多訛踳兼為校正或名聞在昔而今

無可考則約畧方隅景卷附存不敢以傳會失實
至於木蘭界內群山合沓為

巡蹕秋蒐講武之地別見圍場門茲不複叙志山第九

承德府

即熱河廳

磬鍾峯 在熱河

行宮東八里承德府治東北十六里下銳上豐俗稱

棒槌峯

聖祖仁皇帝賜今名每夕陽欲暝萬壑蒼然一峯秀矗亭

亭倚天

御題山莊三十六景中有鍾峯落照峰側石幢一鐫泉湧

帟②四字

酈道元水經注武列水東南歷石挺下挺在層巒之上孤石雲舉臨崖危峻可高百餘仞牧守所經命選練之士彎張弧矢無能屈其崇標者

按古武列水即今之熱河

詳見水門

磬鍾峰近在河

東撐空聳秀知即石挺是也峰側石幢不知何

時所建床為古戶字見許慎說文②為武壘所
造日字見郭忠恕佩觿餘二字無考

御製詩

鍾峰歌

壬申

在天有六星開德宣符贊鴻運在地有崑崙嵒然中峙
四維鎮崑崙一支走華區壇曼案衍羣峰都五嶽五鎮
列方隅扼吭拊背據其樞神禹行水跡雖遍天秘地鑰
無繇見小試僅得及底柱至今䟽導傳寓縣靈皋與壤

應有待乃迴

堯顧怡八彩帶河襟巘關仙莊卓然峰立東岡在東岡峰
立初無名象形闡義錫嘉稱宇宙以來便有此惟

聖人通天地情造物妙在鑪錘間奉三要達神明權平施
稱物無容意治崇金鑑千秋傳八柱何當一已足馬援
標名笑銅沃春來簇簇自為繡雪後晶晶幻成玉穹窿
高矗飛雲流亭亭入望偏宜秋一輪水鏡正圓蒲憑將
掛著千山頭

望鍾峰作歌

已卯

晚熱寧不欲尋涼心中却幸農夫慶肩輿西嶺上絕頂
鍾峰東望遙相當天風吹寒颯衣袂攀陟雖炎爽此際
乃知得逸恒於勞玉柱亭亭况佳致亭亭玉柱幾千秋
風月與侶鹿豕儔而今遍野田廬稠亦復臺榭供清遊
古人曾經到此不鍾峰笑道非所求

羅漢峰 一名彌勒峰在熱河

行宮東稍南三里承德府治東南九里岡巒曼衍望

之似人趺坐坦腹迤北則磬鍾峰

紅石巒 在熱河

行宮東南十里承德府治東南十六里羅漢峰之東
綿亘十餘里其西地勢寬廣土人稱為紅石巒溝
天橋山 在熱河

行宮東南三十五里承德府治東南三十八里山勢
如飛梁跨空縹緲天半與

宮內四面雲山亭相對

御製詩

天橋山歌

甲戌

亭子四面雲山頂東瞻案衍拖橫嶺嶺上天橋對我亭
與梁誰駕虛無境仙人來往扶欄遊彼岸奚藉一葦浮
祖龍鞭石空費力何如天造非人謀武夷長虹事乃幻
謝傅永安桑海變恰似嵩山玉女牕中秋月每從中見
朝陽洞 在府治東稍南三十七里石竇嵌空橫
貫山腹深二十餘丈廣二丈餘其東高盈丈西半

之曉日初生光射石罅隔山可見朝陽義蓋取此
洞内外小佛祠各一

帽盔山 在府治東稍南八十里以形類兜鍪得
名其北十里復有帽盔山土人稱為前帽盔石後
帽盔石

筆架山 在府治東稍南九十里以三峰矗立故
名

五指山 在府治東南四十里五峰峭崿如僂

掌山有古靈峰禪寺寺有僧居實撰五指山大輪
禪師碑至元二十四年建知此山舊名五指矣今
土人稱雞冠山蓋側視五峰累累若雞冠云

駱駝山 在府治東南五指山之東

敵樓山 一名觀音山在府治東南一百六十里
白馬川之南山有至元二十六年僧顯月撰敵樓
山天宮禪院碑稱山在惠州西南巔峰峻拔

按元惠州治在今平泉州界敵樓山在承德府

最東南境與惠州西南方位相合碑文稱有古
殿宇號曰天宮惟設觀音神像則觀音山之得
名有自來矣

鐵虎山 在府治東南九十里

滴水厓 一名珍珠厓在府治東南一百三十里

灤河流經其下山勢盤旋數十里松栢叢鬱積翠

成屏臨河石壁削立山腰有洞流泉琤琤若珠璣

迸落故名

僧冠峰 在府治南稍東二十六里舊名僧官帽

山乾隆三十九年

賜今名峰形如毘盧覆頂土人以雲氣聚散占晴雨之

驗輒應

青雲山 在府治南稍東一百二十里白河之旁

林木翳蔚泉響潺然出叢薄中雲峰寺建其上

烏龍山 在府治東南二百五十里古盧龍山也

盧龍塞當在其地

酈道元水經注盧龍之險峻阪縈折故有九紘之名矣

按盧為黑色烏字義同音屬近似更以盧龍塞証之方位亦合水經注濡水東南逕盧龍塞塞道自無終縣東出渡濡水向林蘭陁東至清陁濡水即今灤河至承德府之東南境迤折而入邊牆所謂濡水又東南境逕盧龍塞也無終即遵化州在承德府南境邊內所謂塞道自無終

縣東出也塞固以山得名境地自當毗接今烏
龍山在承德府本境西南與灤河入邊處東西
相望也况盧龍塞古稱長塹今灤河入邊處當
永平府西北之潘家口為盧龍東塞魏志盧龍
塞與密雲山綿亘不遠當今密雲縣西北與居
庸塞相連為盧龍西塞今烏龍山正當長塹之
中附近東塞也又庾杲之注揚都賦言盧龍山
在罌城北平罌即平剛漢屬右北平郡班書平

剛無終二縣接叙則平剛亦應在遵化州境適
與烏龍山南北相直庾杲之所言不盡無據鄺
道元譏其益浪失實過矣若水經注又載燕景
昭元璽二年遣將軍步渾治盧龍塞焚山刊石
令通方軌刻石嶺上以紀事功則不必定在烏
龍山矣

青松梁 在府治南五十里

鳳凰嶺 在府治南二十五里與青松梁相接皆

在灤河之南

尖帽山 在府治南一百八十里其南接遵化州界

廣仁嶺 在熱河

行宮西十四里府治西十一里嶺之西南即灤平縣境自灤平縣治至熱河為

輦路經行之處康熙五十七年

聖祖仁皇帝發帑開治徑路平坦

賜名廣仁嶺勒碑山上東麓建

萬壽亭三十八年建碑亭一恭鐫

御製雨中乘輿過廣仁嶺詩凡山莊西境諸山皆與廣

仁嶺綿亘相接

王曾行程錄過烏灤河又過墨斗嶺亦名渡雲嶺

長二十里許

曾公亮武經總要北安州有墨斗嶺在德勝嶺北

百二十里

按遼北安州城在今豐寧縣東境之波羅河屯

詳建置沿革門

廣仁嶺在灤河之北正當遼北安州境

內應為古墨斗嶺斗與蚪特傳寫不同耳

御製詩

雨中乘輿過廣仁嶺

癸巳

雲幕山頭雨復施路經橫嶺引閒思身先策馬恒劼昔

年長^上聲乘輿亦順時

曩時行幸山莊啓蹕日即乘馬至迴鑾始間乘輿然遇天雨及過嶺

則仍乘馬茲春秋已逾六旬雨中嶺路泥滑因乘輿以過非尚逸而惡勞順時慎養之道宜如是也瀑響

千巖奔淖濃烟迷萬樹幻離奇僕臣跋涉胥勤職行賞
旌勞例有之

風雲嶺 在熱河

行宮西北三里府治西北六里其北即獅子嶺

獅子嶺 在熱河

行宮北五里府治西北九里嶺勢奇偉如狻猊頽聽
帖依蓮座故名嶺下獅子園嶺之東地勢闊敞名
獅子溝凡普陀宗乘廟諸巨剎多建于此

詳見寺廟門

金山 在府治西北五十里山勢高聳東與黑山

對峙

黑山 在府治西北四十五里山脈周圍數十里
一峯拔起高出羣山石色如黠故名

按凡附近熱河諸山皆金山黑山支派所分

聖祖御製避暑山莊記所云金山發脈又北枕雙峰詩序
所云西北金山東北黑山者是也

大黑山 在府治北一百八十餘里當張三營西

北高二十餘丈周百餘里複嶂懸崖烟嵐蒸鬱遙望默然伊遜河自北來流統其足

按此即古陰山分支也陰山自河套之西北蜿蜒東走經承德府全境之北其正幹為興安嶺是山在承德府北境形勢雄峻附屬興安自是而北直接圍場內諸山蓋陰山遠脈經行旁絡之處凡府屬迤北諸山視此

盤道梁 在府治北境唐三營之東北

象鼻山 在府治北稍東四十四里山勢墮長形

如象鼻故名

湯山 在府治東北八十里山出湯泉流入賽音

河

聖祖嘗駐蹕于此建龍尊王佛廟有

御製碑記

恭載寺廟門

橫道梁 在府治東北茅溝汛境內窪溝之北茅

溝河流經其西

灤平縣

即喀喇河屯廳

雙塔山 在喀喇河屯

行宮東北八里灤平縣治北八里大小二峯矗立百餘丈如窳堵波高下相亞其一峯中開三孔表裏通明

御製詩

雙塔山

癸酉

雙峯聳翠肖浮圖鹿苑當年了不殊入影東西照灤水

插雲南北擬明湖

葦峪嶺 在喀喇河屯

行宮西南十五里灤平縣治西十里自王家營至喀
喇河屯

輦道必經又巴克什營北亦有葦峪土人稱為西葦峪
御製詩

過葦峪嶺

癸巳

塞外地勢殊山多平原少一嶺界兩溪縈繆相環抱土

人刀而耕高低遍巖表美惡雖非齊亦自足溫飽葦峪
茲過嶺沿路農功考頗覺邈迤南春膏知霑少近乃陣
雨作稚禾始有秒為去聲之復望霖曷惠心默禱羽林却
喜晴云弗致行潦明當至山莊雨不為遲好我意汝當
知汝私我亦曉

葦峪 甲午

葦峪迤北閑田功缺澤去年同一望却因昨夜得霽雨
迴蘇綠意看無恙客歲黑城始遇霖

喀喇河屯即漢語
黑城在葦峪北去

歲駐行宮
時夜雨

早祇一宿那殊狀

茲於常山峪即遇
雨較去歲早一日復思今

夏啓鑒晚以是較則反遲宕

昨歲以五月初八日啟鑒
今年則於五月十六日較

遲八日而以距夏至後日
期計之反為早五日也

設更衡之夏至節日雖為晚

時早償較長論短總緣農惟殷虔祝屢綏貺

駝峰 在灤平縣治西南一峰聳峙形似橐駝故

名

御製詩

駝峰歌

壬辰

青山白雲宜目騁一峰遙見峙橫嶺問之其名曰駝峯
昂首聳背還引領有如此哉造物奇以弗意匠匠肖之
誰能翠釜食單列更鮮錦篇揆麗詞此地此名兩相當
嶽嶽立向西南望意有未忘用有殊即今沙漠耕桑暢
我亦因之繫於訪

小黃土梁 在灤平縣治西南二十里較常山峪
西南之黃土梁形勢稍亞

三道梁 在灤平縣治西南五十里

鞍子嶺 在灤平縣治西南六十二里又大水峪口外白河之旁亦有鞍子嶺為灤平縣最西南境常山峪 在灤平縣治西南七十里嶺勢迴環如列屏障

行宮建於麓正據其勝

奇山 在灤平縣治西南常山峪北距官道七里峯勢中間狀如擘裂

黃土梁 在灤平縣治西南八十里常山峪西南

十里

青石梁 在灤平縣治西南九十里與黃土梁形勢相連自兩間房至常山峪群峰綿亘青石梁最峭拔高出諸山之上

御製詩

過青石梁

甲申

石棧隆崇雲裏盤北來屈指最高巒昨朝細雨不成陣今日晴空迴覺寬過嶺東西異流水策驄上下一征鞍

刻脩歲久塗臻坦可復誰歌行路難

過青石梁

丙戌

塞山過雨曉猶雲隱現諸峯濯黛紋為喜農功益茂實
何妨旅景自殷勤近藩已有聯翩至一體曾無內外分
祖訓聰聰仰深意高談底更事云云

青石梁

丁亥

石梁歲往還佳景稱遊攀馬足若無路雲頭復有山飛
流垂振鷺野卉鎖孱顏更喜逢秋霽都忘行旅艱

雨中過青石梁

戊子

夜雨連纖曉未收製衣

六書正譌
雨衣謂製

亦復發行驢途中露

霈乃愈甚馬上逍遙那可留荔阪都成千瀑落蘭蹊忽

作一川流石梁過不逾十里別館常山稱憩休

下青
石梁

復過一黃土坎即常
山峪行宮計里甚近

雨過青石梁

十月初四
日辛卯

徹夜連纖曉未晴輕輿已備御而行

自辛酉秋狩以來
雖甚雨雪皆乘馬

過青石梁而行今晨以值雨所司備輕輿遂御之昨木
蘭中曉往獵場亦有乘輿以行之曰雖從衆請自愧不

如少
年耳
順時養體飲

天道漸石膠車驗物情宜雪雨零候綠暖

往年此際關外已作雪今歲氣

暖故仍雨

降高卑就谷循平披煙南望慰心處潤透冬田麥

始萌

過青石梁

壬辰

曉行塞雲佈四字意謂靈山或施雨須臾雲歛快開晴
濯濯螺峰秀爾許崎嶇砢砢凡千盤登迥造極眼界寬
隆崇大幹東南去亦如瀛海蒼漫漫升覺路長降路短

北高於南信非誕麥尚未收禾黍芄愛此宜暘著鞭懶
星龕巖 在灤平縣治西稍北五十三里

聖祖仁皇帝御題巖名巖間鐫石佛像三有寺名星龕巖
寺

喇嘛洞 在灤平縣治西七十里石洞中虛形如
廣廈

偏嶺 有前後二嶺後偏嶺在灤平縣西一百里
當鞍匠屯之南又南為前偏嶺

王曾行程錄過偏槍嶺四十里至卧如來館過烏
灤河

按偏嶺即行程錄所載偏槍嶺烏灤河即今灤
河偏嶺在喇嘛洞西三十里外疑喇嘛洞即卧
如來館之舊也

十八盤嶺 有大小二嶺大十八盤嶺在灤平縣
西南一百十里其南四為小十八盤嶺

王曾行程錄出古北口度德勝嶺盤道數層俗名

思鄉嶺

按十八盤嶺在古北口外直北境磴道迴盤應即行程錄所云德勝嶺也

火石嶺 在灤平縣西南二百三十里白馬關口外

挿箭嶺 在灤平縣西南二百四十里高家營北潮河流經其西

七道嶺 在灤平縣西南二百五十里

椴樹嶺

在灤平縣西南二百五十餘里潮河流

經其麓

五道梁

在灤平縣西二百三十里

廟兒梁

在灤平縣西三百里

豐寧縣

即四旗廳

元寶山

在鑲白旗土城子

即豐寧縣治

東稍南十五

里山形中凹旁峻以形似得名

按豐寧縣治在鑲白旗土城子所屬四旗分地

如前四旗廳之制茲編次境內諸山仍按四旗
所屬分載方位道里以期明晰云

博羅梁 在鑲白旗土城子南六十里其南即灤
平縣界

官兒嶺 在鑲白旗土城子西南二十里其西南
即鑲黃旗界

鐵家伙梁 在鑲白旗土城子西六十里其西即
鑲黃旗界

赫山 在鑲白旗土城子西稍北二十五里錫喇

塔拉川之西山峯峭拔林木蔚然為縣西勝境

五峰山 在鑲白旗土城子東北九十里五峰環
列澗壑深幽山有興隆寺

白雲山 在鑲白旗土城子東北一百二十里山
腹一泉自洞中流出最為清冽

筆架山 在正藍旗黃姑屯
即波羅河屯東稍北十里

山正當波羅河屯

行宮之東三峰列峙中翹旁亞作筆架形

御製詩

筆架峰

戊寅

筆架三峯迥出群支天萬古翠嶙峋宣毫湘管難堪倚
合付尋常腹藁人

化工著意玉雕鏤肯使詞人弄筆頭李白若曾經到此
不知奇句幾多留

於波羅河屯詠東山筆架峯

戊子

天開地闢此遺踪未許南人弄藻鋒笑彼珊瑚誇寶重
鎮茲鉢捺永提封祇今來往常凝望自古詩文必有宗
不是杜韓大手筆誰當佳作倚高峯

文昌襍錄云契丹謂住坐處曰捺鉢按遼之後即今
索倫其語與滿洲有相同者國語謂住處曰巴納若
作鉢捺尚可云音譯之訛乃并顛倒其文則失之益
遠矣總由彼時中國人言語不相通習信手妄書不
自知其舛謬即如金遼元三史中類此者難以枚舉

將悉為改譯而稗野流傳則經用始能辨訂耳

璫瓏峯 在中關

行宮東十五里正藍旗黃姑屯東稍南六十里舊名
興隆山山峯嵌空有洞西向深十六丈許隙光穿
透非雕鏤所及乾隆十九年七月

巡蹕經臨其地因

賜今名

御製詩

璫瓏峰

有序
甲戌

過中關行宮迤東十餘里有峰拔地嵒嵒率律望
若翠屏嵌空虛洞似僊人之所棲止名之曰璫瓏
而係以詩

朝催行騎綠谷東
新程逐處咨民風
沼岡度澗凡幾重
路右遙見凌霄峰
巍乎氣象迥不同
羣山拱伏孰與京
叶倚天拔地超哉雄
嵌空洞穴宛轉通
摧峩巖薛森龍
慈竒葩真樹那可名
叶幻以雲氣鬱豐隆
石戶儼開守

玉童丹竈碧火其燄紅垂垂鐵鎖懸長空凡骨悵望難
尋蹤在昔下風訪崆峒塞垣荒略傳何從欣茲始遇名
璫瓏飛來奚事艷吳中至今吟咏紛莫窮

固都爾呼達巴罕 在正藍旗黃姑屯東固都爾
呼河經流其旁故名山脈始于官家厰蜿蜒而南
至中關綿亘百餘里

雲光洞 在正藍旗黃姑屯南四十里山勢阻深
其右有泉從石間出東南流會入固都爾呼河山

麓有洞嵌空康熙六十一年就洞建寺

聖祖仁皇帝賜額曰雲寶珠光故即以雲光名洞

金廠梁 在正藍旗黃姑屯南稍東三十里

赤土梁 在正藍旗黃姑屯南十里

苔山 在波羅河屯

行宮之西正藍旗黃姑屯西北伊遜河之北有浮屠
三級高矗峯頂東則伊遜河西則伊瑪圖河蜿蜒
如帶夾流山下

平頂山 在正藍旗黃姑屯東北七十五里頂平如砥而石壁剝削每白雲滃然瀾漫峰頂則山雨立至土人以為占候此山綿亘廣遠其北即園場界

按遼史地理志載高州有平頂山遼高州為赤峰縣境今豐寧縣為遼北安州地與高州方位不合蓋山名偶同也

大對山 在正白旗郭家屯東南五十五里灤河

流經其下

黑山 在正白旗郭家屯西南二十五里

沙爾呼山 在正白旗郭家屯西稍南八十里錫

喇塔拉川即興州河發源於此其西即鑲黃旗界

鳳凰山 在正白旗郭家屯西北灤河之北

喇嘛山 在正白旗郭家屯北三里半山石洞一

仄徑沿緣盤紆而上林壑幽絕

湯山 在正白旗郭家屯北三十五里山有溫泉

東南流入小灤河

窟窿山 在正白旗郭家屯北三十五里三峯屹
立有石穴在三峯間故名

半壁山 在正白旗郭家屯北六十里石壁陡削
形若堵牆小灤河流經其下其北即圍場界

龍泉山 在鑲黃旗大閣兒東稍南五十里有大
小龍潭三水從石罅中出三潭遠注東南流入潮
河

塔山

在鑲黃旗大閣兒東南六十里山有古塔

一

白雲洞

在鑲黃旗大閣兒東南七十五里亦名

朝陽洞洞頂有雙瀑對懸飛流樹杪洞內有神像
鐫額曰寶華臺不知何時書外種山桃百餘株春
時霏紅掩映尤增勝致

帽山

在鑲黃旗大閣兒南稍西六十里山有石

柱高百尺三巨石疊立其上形若峩冠

湯山 在鑲黃旗大閣兒西南四十里山出溫泉
洪湯寺建其側土人稱其地為湯上湯河發源于
此

按此與正白旗之湯山別考水經注沽水東南
右合高峰水又西南流出山沽水即今白河高
峰水即今湯河詳見水門湯河發源于湯山則山即
高峰之舊矣

平西梁 在鑲黃旗大閣兒西南八十五里其西

即獨石口廳界

大草坪梁 在鑲黃旗大閣兒西南八十餘里其
西即獨石口廳界

按舊一統志謂李文忠敗元兵于駱駝山即此
然考文忠當日出居庸趨開平為今之多倫諾
爾迂道至此恐未必然也

十八盤嶺 在鑲黃旗大閣兒西一百三十里其
西即獨石口廳界

按此與灤平縣屬之十八盤嶺別又考元周伯琦扈從詩注曰入黑谷過色澤嶺高峻曲折凡十八盤伯琦所經由今獨石口外迤東而行正歷今豐寧縣西境此十八盤嶺疑卽色澤嶺

伊克達巴罕 在鑲黃旗大閣兒西北一百二十里其西卽獨石口廳界

喇嘛山 在鑲黃旗大閣兒北稍西六十里羣峯迴合有月珠寺建其上金碧觚稜隱出林杪最為

幽勝

按此與正白旗之喇嘛山別

巴顏哈達 在鑲黃旗大閣兒北稍西一百三十里

韭菜梁 在鑲黃旗大閣兒西北一百八十里灤河流經其下

僧機圖達巴罕 在鑲黃旗大閣兒北二百十里其北即多倫諾爾廳界

平頂山 在鑲黃旗大閣兒東北六十里山勢綿亘其東北與正白旗之沙爾呼山相接

按此與正藍旗之平頂山別

大黑山 在鑲黃旗大閣兒東北九十里

青石拉綿山 在鑲黃旗大閣兒東北一百八十

里土人亦稱為大山綿亘數十里其北即圍場界

天財梁 在鑲黃旗大閣兒東北一百九十里亦

名官道梁

欽定熱河志卷六十五

欽定四庫全書

欽定熱河志卷六十六

山二

平泉州

即八溝廳

鳳凰嶺 在平泉州東五十里複嶂中開為州東境之門戶嶺上山桃極盛春時遠望如紅霞其東即建昌縣界

映碧山 在平泉州東八里高五里廣三里

瑤琤山 在平泉州東稍南三十里山陽有石洞
中構屋祀泰山神有二泉一自高巖下注一自山
麓湧出流遶山下

獅山 在平泉州南稍東六里高三里廣二里山
勢雄偉作狻猊昂首形其東峭壁石色全赭土人
稱爲紫霞峰

象山 在平泉州南五里以山形似象得名其東
與獅山相對爲州境之形勝豹河流經兩山間

冷嶺 在平泉州南八十里

明史地理志會州衛有冷嶺

按冷嶺在會州城南六十里與明史地理志相符又考明宣宗實錄載親征烏梁海丙辰駐寬河明日至冷嶺又明日駐會州今冷嶺在寬河城北三十里所載方位亦合應即此山也

金沙溝山 在平泉州南一百里以沙色如金故名

紅山 在平泉州西南十里高二里廣一里

老姥山 在平泉州西南三十里

猴山 在平泉州西稍北五里高六里餘廣二里
危峰孤峙高出雲際每朔雪初晴皚如積玉土人
所謂猴山積雪也

烏勒呼瑪梁 在平泉州北六十里喀喇沁右翼
境有山泉匯流南入豹河

黃土梁 在平泉州東北四十里喀喇沁右翼境

烏勒呼瑪梁之東南豹河發源於此

石佛溝山 在平泉州東北一百二十里喀喇沁
右翼境石壁上鑿佛像一

喀卜齊爾東山 在平泉州東北一百六十里喀
喇沁右翼境有洞深三丈餘洞外石筍矗立有泉
清鑒毛髮上建龍神祠

和爾圖崑都楞喀喇山 在平泉州屬喀喇沁右
翼東二十里

畢齊克圖達巴罕 在平泉州屬喀喇沁右翼東
四十里

烏爾圖納蘓圖波羅山 漢名萬壽山在平泉州
屬喀喇沁右翼東七十里

額卜特山 漢名秋鷹山在平泉州屬喀喇沁右
翼東八十里

伊瑪岱山 在平泉州屬喀喇沁右翼東九十五
里

錫納喀喇山 在平泉州屬喀喇沁右翼東一百五里

和爾博勒津山 漢名七金山在平泉州屬喀喇沁右翼東一百二十里

遼史地理志聖宗過七金山土河之濱南望雲氣有郭郭樓閣之狀因議建都又中京大定府有七金山

金史地理志北京大定府有七金山

元一統志七金山在大寧縣北十五里東西長十
里南北廣五里山有七峯因名遼時嘗建三學寺
於中

按遼金大定府即今平泉州境之大寧故城元
大寧縣即遼金大定府屬之大定縣

詳建置沿革門

今

和爾博勒津山漢名與古相同在老河

即古河

東

岸西南距大寧故城不遠知為古七金山矣明
一統志稱烏梁海有七金山應亦指此

超圖喀喇山 在平泉州屬喀喇沁右翼東一百二十餘里

哈特哈山 漢名妬山在平泉州屬喀喇沁右翼東一百五十里烏巴河發源於此

巴顏烏蘭山 漢名大紅螺山在平泉州屬喀喇沁右翼東一百八十五里

按明史朶顏傳有紅羅山羅與螺音同疑即此山

托來圖山 漢名兔兒山在平泉州屬喀喇沁右翼東南九十五里又右翼東南一百五十里有托來山

巴圖察罕山 漢名柞山在平泉州屬喀喇沁右翼東南一百餘里

喀喇和碩山 亦名大斧山在平泉州屬喀喇沁右翼東南一百五里伯爾克河發源於此

巴顏喀喇山 漢名大青山在平泉州屬喀喇沁

右翼東南一百十五里

蒐克哈達山 在平泉州屬喀喇沁右翼東南一

百二十餘里

摩勒津陀羅海山 在平泉州屬喀喇沁右翼東

南一百二十五里

庫克碩卜和爾山 在平泉州屬喀喇沁右翼東

南一百四十里

錫默特山 在平泉州屬喀喇沁右翼東南一百

八十里圖爾根河發源於此

博爾多克山 在平泉州屬喀喇沁右翼東南一百八十餘里

達爾罕陀羅海山 在平泉州屬喀喇沁右翼東南一百九十里

察罕齊巴噶山 在平泉州屬喀喇沁右翼東南二百里

圖爾罕陀羅海山 在平泉州屬喀喇沁右翼東

南二百三十里

哈特呼朗台山 亦名雞冠山在平泉州屬喀喇沁右翼南九十五里山石如雞冠故名

霍爾霍克巴達罕 亦名霍爾霍克阿圭山以山

洞得名在平泉州屬喀喇沁右翼南一百二十餘里有二洞皆僧所居依洞架楹構精舍於其側戶牖旁通隨山向背其東則霍爾霍克河出焉其西則賽音河發源於此即熱河之東源

克依斯庫哈達 在平泉州屬喀喇沁右翼南一

百三十里

伊瑪圖哈達 漢名羯羊山在平泉州屬喀喇沁

右翼南一百三十五里

呼察察罕陀羅海山 在平泉州屬喀喇沁右翼

南一百四十里呼察河發源於此

察爾吉山 在平泉州屬喀喇沁右翼南一百四

十餘里

拜察山 漢名神山在平泉州屬喀喇沁右翼南
一百五十里

遼史地理志中京澤州有神山

元一統志神山在惠州西南十三里東西長十里
南北廣八里中有古廟

按元惠州即遼澤州在今平泉州南境與此方
位相合當即古神山也

巴顏山 漢名富山在平泉州屬喀喇沁右翼南

一百七十里

拉克圖爾山 在平泉州屬喀喇沁右翼南一百八十五里

永安山 漢名馬孟山在平泉州屬喀喇沁右翼南一百九十里地產鉛砂老河發於此

遼史地理志中京大定府有馬孟山

元一統志馬孟山在大寧縣西六十里中有一峰形類馬孟故云

按遼史元志所載馬孟山與今州屬之永安山
方位相合且漢名馬孟當即此山宋王曾行程
錄稱富谷館東望馬雲山山多禽獸林木國主
多於此打圍馬孟與馬雲乃音之轉實一山也
歐陽修詩曰馬孟山西看落霞應即指此

特卜什山 漢名方山在平泉州屬喀喇沁右翼
南一百九十里

昌吉爾岱山 在平泉州屬喀喇沁右翼南二百

里青龍河發源於此

額林畢老圖達巴罕 在昌吉爾岱山之西南

英圖谷 在平泉州屬喀喇沁右翼南二百餘里
都呼喀喇山 在平泉州屬喀喇沁右翼南二百
十里

克勒達巴罕 漢名鴉嶺在平泉州屬喀喇沁右
翼南二百二十里

拉克拉哈爾山 在平泉州屬喀喇沁右翼南二

百三十里

台吉喀卜齊爾谷 在平泉州屬喀喇沁右翼南
二百四十里

昆都楞喀喇山 在平泉州屬喀喇沁右翼西南
八十里

察罕齊老圖山 漢名白石山在平泉州屬喀喇
沁右翼西南一百三十里

溫德根圖喀喇山 在平泉州屬喀喇沁右翼西

南二百里

蒙克達巴罕 在平泉州屬喀喇沁右翼西七十里

納喇蘓台山 漢名松山在平泉州屬喀喇沁右翼西八十里

遼史地理志中京大定府有松山

元一統志松山在富庶縣西五十里南北長二十里東西廣五里地多松因名

按納喇蘓台山與遼史元志所載松山方位相合至遼上京臨潢府有松山饒州有松山又松山州亦以松得名皆非中京道所統地應在今赤峰縣境內與此喀喇沁右翼之松山別

庫都爾圖山 亦名陷山在平泉州屬喀喇沁右翼西八十餘里

教保爾威遜圖山 在平泉州屬喀喇沁右翼西一百里

阿魯威遜圖山 在平泉州屬喀喇沁右翼西一
百十里

察罕陀羅海山 在平泉州屬喀喇沁右翼西一
百餘里形勢高大北接圍場諸山南與默沁達巴
罕山脉連亘故亦稱為默沁察罕陀羅海山其東
則錫伯河出焉其北則圍場內之穆壘喀喇沁河
出焉其西則固都爾呼河發源於此即熱河之西
源

默沁達巴罕 在察罕陀羅海山之南其西則茅
溝河發源於此即熱河之中源

烏赫克圖山 在平泉州屬喀喇沁右翼北三十
里

鄂端台呼喇圖山 在平泉州屬喀喇沁右翼北
四十里

綽和羅摩林達巴罕 在平泉州屬喀喇沁右翼
北七十里

察卜齊爾山 亦名掃林山 在平泉州屬喀喇沁
右翼東北七十里東南麓有古塔一

額克波羅山 在平泉州屬喀喇沁右翼東北九
十里

阿里衮察克察罕陀羅海山 在平泉州屬喀喇
沁右翼東北一百里

烏納格圖達巴罕 漢名野狐嶺 在平泉州屬喀
喇沁右翼東北一百餘里

廟兒嶺 在平泉州屬喀喇沁右翼東北一百二十里廣八里高一里其北有岡徑許里土赤如赭童無草木土人言時有烟氣空湧彌漫山谷

赤峰縣

即烏蘭哈達廳

烏蘭布通山 在赤峰縣屬翁牛特右翼東十五里

烏蘭哈達 在赤峰縣屬翁牛特右翼東三十里
伊克布祜圖爾山 在赤峰縣屬翁牛特右翼東

四十里

巴噶布祜圖爾山

在赤峯縣屬翁牛特右翼東

東五十里

布祜圖山

漢名白鹿山在赤峯縣屬翁牛特右

翼東七十里

布當華山

亦名大華山在赤峯縣屬翁牛特右

翼東九十里

扎喇山

漢名蝟山在赤峰縣屬翁牛特右翼東

烏納格圖山 漢名屋狐山在赤峰縣屬翁牛特
右翼東一百二十里

華和博圖山 在赤峰縣屬翁牛特右翼東南四
十里

阿里衮察克察罕陀羅海山 在赤峰縣屬翁牛
特右翼東南八十里

按此與平泉州之阿里衮察克察罕陀羅海山
別

齊巴噶山 漢名棗山在赤峰縣屬翁牛特右翼
東南一百里

古爾班陀羅海山 在赤峰縣屬翁牛特右翼南
二十里

遮蓋山 亦名阿圭山在赤峰縣屬翁牛特右翼
南三十餘里入山十餘里有洞寬不及二丈高一
丈有餘土人稱為大碾子洞中有石佛像及阿難
迦葉像其兩崖石壁上亦俱鑿成佛像有金皇統

三年劉子初撰遮蓋山靈峰院千佛洞碑

元一統志遮蓋山在松州東南二十里有古寺石
洞石佛

按赤峰縣為元松州境志載遮蓋山佛洞之蹟
亦與今合

畢齊克圖達巴罕 在赤峰縣屬翁牛特右翼南
八十里

按翁牛特右翼之西境西南境西北境諸山凡

在圍場界者俱載圍場門

都爾伯勒津山 漢名方山在赤峰縣屬翁牛特
右翼東北二十里

按此與平泉州之方山別

伊瑪圖山 漢名韃羊山在赤峰縣屬翁牛特右
翼東北三十里又左翼西南一百里有伊瑪圖山
亦名韃羊山

按此與平泉州之韃羊山別

巴噶喀喇山 漢名小黑山在赤峰縣屬翁牛特

右翼東北四十里

拜斯哈勒山 漢名思德山在赤峰縣屬翁牛特

右翼東北四十五里

布爾克爾圖山 在赤峰縣屬翁牛特右翼東北

五十里伯爾克河流經其下

特克勒特山 漢名繫翰山在赤峰縣屬翁牛特

右翼東北六十里

鄂爾綽克山 在赤峰縣屬翁牛特右翼東北六十五里又左翼西南八十餘里亦有鄂爾綽克山扎喇哈達 在赤峰縣屬翁牛特左翼境為左翼貝勒駐處

巴噶哈勒占山 亦名小華山在赤峰縣屬翁牛特左翼東二十里

阿爾察圖察罕岡 在赤峰縣屬翁牛特左翼東南八十里

伊克納喇蘓台山 漢名大松山在赤峰縣屬翁
牛特左翼南二十里

富弼行程錄自中京正北一百九十里至松山館

按宋劉敞有寄歐陽修宿松山詩富弼歐陽修

之使遼皆由中京

今平泉州東北
之大寧故城

而北至上京

今赤峯縣北
境巴林旗界

是松山當在中京之北此伊克納

喇蘓台山方位近之若平泉州屬喀喇沁右翼

西境亦有松山其地在中京之西非至上京所

經路也

扎固圖察罕陀羅海山

在赤峰縣屬翁牛特左

翼南五十里

阿多固沁山

在赤峰縣屬翁牛特左翼西南八

十里

布敦山

在赤峰縣屬翁牛特左翼西三十里

巴爾哈岱山

在赤峰縣屬翁牛特左翼西四十

里

薩喇納台喀喇山 漢名山丹山在赤峰縣屬翁

牛特左翼西一百三十里

古爾班圖勒噶山 在赤峰縣屬翁牛特左翼西

北七十里又左翼北三十里亦有古爾班圖勒噶
山

翁格綽爾山 在赤峰縣屬翁牛特左翼西北一
百三十里

翁衮山 漢名神山在赤峰縣屬翁牛特左翼西

北一百四十里

按此與平泉州屬之神山別

菟濟山 在赤峰縣屬翁牛特左翼西北一百五十里

布爾噶蘓台山 漢名柳山在赤峰縣屬翁牛特左翼西北一百五十餘里


哈達圖山 在赤峰縣屬翁牛特左翼北三十里

布靜克依山 漢名兔廐山在赤峰縣屬翁牛特

左翼東北四十里

遼史地理志中京惠州太祖俘漢民數百戶於兔
廐山下創城居之

按遼惠州在中京之東北高州之東當在赤峰
縣東北境與此方位相合



欽定熱河志卷六十六